

2 TIMODHY

Riown Wargahng Agweed Poale Yihr Timodhy

Rob Ke Nying Warga

Goan ka duohng yi riown wargahng Poal naa agweede yihr Timodhy beehda puohny wa ka nahge nyethiin kede a ngad kony yihr Poal. Gihn teeg yea keraahyo beehda guum. Timodhy apuohny kede a cwihnye aciihm ne mag rob kede a puohny ke nying Jeacuu Kriihjto beer mee ke nud cwihny. Kare nud umage puohny adiehr gihr Ciig Beer kede a lum Anweehd gihn acoon kede a uyuge tiihye wa ngad puohny maa ngad nyoadh lum Juog, giih me yuge cang kii raahm kede a mahn ke nyoge mooge.

Timodhy atoohn ne cohg ke nying ka raaje kii ngo nea ree amade yi yug giih beehl kede a peehm ke toohd me gihn me kony gene tooro, abea ge lyaahb wudh yaa lihng gen urwaahny gene.

Yihdh giih ni cang e aber yihr Timodhy e kar kaa naa abeehd Poale maa gihn anaa acube yi cwihny yiioh gihre, teeg cwihny, guum maa raahm yi bahng.

Kaa Acaan Luube

Lum umodho 1:1-2

Muohj kahw kede a doohr 1:3-2:13

Atoohno 2:14-4:5

Beehd mar Poal ke ngude 4:6-18

Gug luube 4:19-22

¹ A Poal e ne gweehd yihri, yih Timodhy a ge aohr Jeacuae Kriihjte neehn kaa agweehg Juoge ngo coon. A aohre ne teed lum Juog yihr nyoge kede a ne nyoadh ngo

yihr gen kejea nea Jeacuu yihi gene yiho, e boadh wahy me be gug yoad gene yoado. Boadh wahy gihn nweehd won keehd Jeacuu Kriihjto.

² * Timodhy, warga gihn agweeda yihri bang gihn yih neehn nyethiin yeya maa anhyaara ke nying kaa ayihi lum Juog kii ngo. Beehn Juog Wuure kede a Jeacuu Kriihjto Ruohdho cub gene muuny mar gen kede a doohr mar gen yihri maa duu gene cwihny gen caahn rihi.

³ Juog koohre muohja muohjo ne naang ke bang dewaahr kede a decahngo. Juog gihr ge wura en ne wura kede a beehdo kaa dhe yooh me ne cohg me meehg cwihny Juog mihno riha. E naa gihn beehda ke cwihnnya acielo. Ke nying nihn, e kwahya yihr Juog, e wiha be wul ne kwaj ke nyingi. ⁴ Piih wongi ge anaa awoj piny ge poohd para paro. Yih acana keraahyo, a daahd uniida yihn keehdo beere cwihnnya naa yum. ⁵ Kwaad yiho gihn ne yihri be wul yi wiha. Ngo uroomo keehd yiho mar wongu ge cuohn ne Loaj kede a mar miihu ge cuohn ne Yunij. Ngo dhiila kaa ngahyo kejea yiho gihri noono ree ujwage.

Muuny Acub Juoge Yihr Timodhy

⁶ Ke nying kwaad yiho gihn ayihi lum Jeacuu, e naa gihn bera ngo yihri kejea mag muuny Juog gihn ayoadi cahng anaa acuba cinga yi wihi. Cinga anaa acuba yi wihi ne dooj yihn kede a ne cub yihn yi tihiy kwaag yaa ayiho.

⁷ Teeda teedo yihri kejea bar maalo ke tihiy nu, bang gihn Juog Wahy Juog acube yihro beere wo be tud. A teeda yihri kejea bar maalo ke tihiy nu bang gihn Juog wo amuoje ke Wahy Juog me wo be weehge tudo, abea Wahy Juog cub tee kede a nhyaro kede a dhe yoohn koar rogo.

* 1:2 1:2 Timodhy: 1Tim 1:2; 1Kor 4:17 1:3 1:3 Pihp 3:5; 1Tim 1:5 1:5
1:5 Tihiy 16:1 1:6 1:6 1Tim 4:14 1:7 1:7 Rom 8:15

⁸ Nea lum Juog ayiiho beer mee e wihi be laahy ne rob ke nying Jeacuu yihr nyoge kedea ne rob ngo kejea a beehda gomi. Yih kea tud nea yih ke maa neehn ka beehda kan yi thijin. Dhiil guum neehn mara ke nying Juog bang gihn Juog yih umuoje ke tee me guumi gihi me reje. ⁹ Anahg Juog e naa par ngo e keede ne boadh wahyo kedea ukwanye won ne tihiy tihiye. Gihi nu ge ayug Juoge yihro padh ke nying gihn maa tihiyo yihre, anahg ke nying gihn maa atage kedea ke dhe yoohn muuny mare. Muuny ngo acube yihro, ke nying Waahde Jeacuu Kriihjto. Acube yihro yi nihn umodho e maalo maa piny ge puud kuu acage. ¹⁰ † Gihn maa anaa angahyo ke nying gihn atag Juoge ngo atooro. Abea, awaahn ni ngo anyoadhe yihro naa abeehn Jeacuu Kriihjto Ngad Boadh nyoge. Jeacuu, thoo ataaje kedea unyoadhe beehdo me yea tooro thoo yihro ke dhe yoohn kitaab Juog. ¹¹ Ngahyi kejea lum Juog ke ngude e naa akwany an kedea uyuge an ne ngade me oohre ne rob ke nyinge kedea ne puohny Ciig Beer yihr nyoge cang. ¹² Ke nying tihiy akwany Juoge an yea, e naa gihn ayoada gihi raahm rog. Abea keehd maano e wiha be laahy, bang gihn ngaa acub tihiy yihra beehda ngaa me ngahya kedea ngo gaahna gaahno. Ngo angahya kejea gihi atiihya ge pahdh yi cwihnye cang, kedea ke nying gihi nu atiihya, a ukooge cahng uduu Jeacuu.

¹³ Dhe yoohn puohny maa athiir gihn alihngi banga ngo kea wii. Puohny yaai ke puohny maa athiir. Puohny nyoge ne cohg ke dhe yoohn me yihi gene Jeacuu Ngad boadh won unhyaare. ¹⁴ Wahy Juog gihn beehdo ke won yih ukonye ne mag luube gihi beey ge wii Juoge yi cingi.

1:8 1:8 2:9; Rom 1:16 1:9 1:9 Epi 2:8-9; Tii 3:5 † 1:10 1:10 Jon 1:14;
 Tii 3:6Thoo: 1Kor 15:20, 55, 57; Judea 2:14-15 1:11 1:11 1Tim 2:7 1:13
 1:13 1:5; 1Tim 1:10 1:14 1:14 1Tim 6:20

¹⁵ Ngahyi kejea Piigeluj maa Ehrmojean kede a yaa yiiho gi ih abeehno ke yoohn piny Aacya ge goohd oogo riha. ¹⁶ † Abea Onecipoaruj gihn me beer atiihye yihra. Beehn Juoge dooje Onecipoaruj kede a yaa paare ke nying gihn beer e ayuge. A aliewe tiel me thoohdh kede a umeehge aduuna ngahmo. Wiihe kuu alaahyo ne liew an keehd maa anaa yi thijin, ¹⁷ bang gihn kaa awahnhe ke geen Roama, e athubo ke daahd kara uwahdhe kaa ayoade an. ¹⁸ Beehn Juoge wiie gi ih me reje naa atiihy Onecipoaruje piny yih r ngo cahng ukihm Juoge nyoge. Ngahyi thiow kaa akonye an kii ngo kaa anaa yi geen Epicoj.

2

Ka Uguum Timodhy Gi ih Ajohr

¹ Abea yih waahda, ngahm cwihnyi ke nying muuny Juog gihn nweehd won keehd Jeacuu Kriihjto. ² Luube gi ih anaa alihngi e ge roba robo nyum amahr nyoge puohny gen yih r nyoge me cwihny be diiw rog gen. Puohny gen yih r yaa cwihny be diiw rog gen ne baar gen wong maalo yih r nyoge.

Yih Umuoj Jeacuue Ke Tee Me Romi Guum Nyepinye

³ Deed cwihnyi ne guum gi ih raahm udoohngi ne ujaadya me kag ke nying Jeacuu Kriihjto neehn mara. ⁴ Wa maano nahgi ujaadya gi hr Jeacuu Kriihjto, wi ihi keá cahg ke cub ne ti ihy gi ih wi ih ngoom. Nea wi ihi cubi ne ti ihy gi ih ungoom e gi ih adaahd ngaa akwany yih n yi jeaj gi hre be rom rog gen ke ti ihy yih ri wa ka daahde. ⁵ Caahdhi kaa dhe yoohn loohng gi hr Juog beere gihn me beer yoadi yoado. Yi cohgo ke ngweej ngaa e ne cub gihn me beer

1:15 1:15 4:16 † 1:16 1:16 Onecipoaruj: 4:19 2:2 2:2 1Tim 1:10; 4:14
2:5 2:5 4:7-8

yihre? Ngaa cohgi ke dhe yoohn loohng gihn arobe wale ngaa cohgi ke kar wiihe maa atage? ⁶ Keehd yi puur. Ngaa en kuong kaj? Ngaa apuro umodho wale ngaa apuro dhe caahn? ⁷ Caadh yihdh ucaale giih roba yihri, beere Juog wiihi yabe yabo unгахyи yihdh gen.

⁸ Giih beeye ne puohnya ge ngahyi. A upuohnyo kejea Jeacuu Kriihjto en naa Ngad Boadh nyoge, kedea naa athowe e ngo ameehg Juoge cahro ne nyoadh ngo kejea Jeacuu Kriihjto beehda Waahd Juog. Thiow beehda dhaano bang gihn ngo beehda kwaar Deabid, kedea e naa Ruohdh. Kwaayi bange ke paro beere kwaan giih apuohnya yihri tee aduulo cub gene cubo yihri. ⁹ Raahm rog me duohng ne riha kedea tiena ge areehg ke gele ke nying giih nu apuohnyo wa ngaa maa atiihy awuohj me duohng. Abea keehd maano e lum Juog be rom ree ke reehgo ke gele wa mar dhaano ukar. ¹⁰ Abea ka me kweera ke giih raahm rog tooro nea raahm riha boadh wahy gihn cub Jeacuue yoad nyoge yoado, boadh wahy me meehg nyoge beehdo ka maa acielo yi Dhaahr Juog e amiihr ke mihn cwihny me be gug ne naang.

¹¹ Ngahda beehda adiehr kejea,

“Nea wo uthoo keehd Jeacuu,
e wo ubeehdo keehde tiehd Paar Juog.

¹² Nea wo bar maalo ke guum ke nying Jeacuu

e wo unahg ruohdhe tiehd keehde.

Nea wo ukweer ke Jeacuu nea gihn me raaj apahdh wudho,
e ngo ukweer ke won thiow.

¹³ Nea yiiho gihro udoohng thiin

e yiiho mare be doohng thiin bang gihn ngo beehda
ngaa me lume be waare.

2:8 2:8 Rom 1:3-4; 1Kor 15:4 2:9 2:9 1:8; Epi 3:1; Pihp 1:12-14 2:10
2:10 Rom 5:2; Klo 1:24 2:11 2:11 Rom 6:8 2:12 2:12 Mat 10:32-33; Rom
5:17 2:13 2:13 Rom 3:3-4

Lume be waare bang gihn wo anhyaare kedea cwihtnye ukonye won.”

Luub ni ge ne rob gihn maa athiir.

Liny Keehl Ke Yaa Puohny Giih Ucahb

¹⁴ Timodhy, lubo acielo moogo nud me teeda yihri. Wiihi keá wul ne ber yihdh luub ni aroba yihri yihr nyoge kedea ngweel ngo piny yihr gen ke nying Juog kejea wudh gen kea cub gene ne peem luube me gihr nying gen tooro, bang gihn peem kwaad luub nu wudh yaa ayiiho urahnyo nea ge lihng gene lihngo. ¹⁵ Yug rihi beer mee beere Juog ka beehdi kii ngo nhyaare nhyaaro. Thiow bar maalo ke tiihyi, wiihi keá laahyo ne gihn tiihyi. Puohny lubo maa adiehr ke dhe yooh me ne kew. ¹⁶⁻¹⁷ *† Yih kea piih ne rob ke nyoge me puohny giih maa toohd ke nying Juog. Bang gihn yaa peem giih toohd rog gen uyoad gene e ge aay maahdh oogo yi lum Juog neehn ngaa me ree ne ler. Kwaad peehm gihn nu kahl ngwiilo rog yaa yiiho, ngwiilo muu uroomo kaa adhoohlo me dhiil wong dhaano piny: kwaad adhoohlo me be cieg me nahg dhaano ke tuud. Yimoanoj maa Pihltuj ge ne kiin yaa puohny giih toohd. ¹⁸ Yaa nu ariow lum Juog abaj gene ulyaahb gene wudh yaa ayiiho. Kob gene kejea ngaa muu ucahg cahro tooro keehdo, bang gihn cahr nyoge wiihe agug. Puohny gen noono kaa ayiih nyoge mooge lum Juog kii ngo yea ngo awuoj gene piih. ¹⁹ Abea toohd now, lum Juog tiene akeehd piny, gihn me lwag yea tooro. Juog yaae ge ngahye kedea ngaan koohbo kejea Juog ayiihe, dhiile tiihy giih me reje ke wiio.

2:14 2:14 1Tim 1:3-7; 6:4; Tii 3:9 2:15 2:15 1Tim 1:10 * 2:16-17 2:16
1Tim 1:4 † 2:16-17 2:17 Yimoanoj: 1Tim 1:20 2:19 2:19 Jon 10:14

²⁰ Paajo yea be toohr ke roohd maa agweed kedea muu kuu agweed. Roohd maa agweed ge kahl oogo nea weehno me wuor nud. Abea roohd kuu agweed ge ne tiihy nyoge ke gen yi nihn maa now. ²¹ Yaa ayiih Juog ge akweer ke giih puohny yaa toohd, ge ne room keehd roohd maa agweed ge ne cub yihr Juog ne tiihy giih beeye e daahd Juoge.

²² Kwaad giih reje e yug yaa reje cwihnyi keá cub rog gen, kedea nahge giih meehg yihn yug gihn me beer ge ne cubi cwihnyi ne tiihy gen. Nahgi ngad nhaaro maa ayiih Juog. Beehd beer mee kedea e cwihnyi med keehd yaa anhyaar Juog kaa aduun gen cang. ²³ Doga kaa bero yihri kejea giih peehm me gihr nying gen tooro, yih keá tiihyo ke gen. Bang gihn kwaad peehm me wa gihn nu nyoge keehg gene keehgo. Wii gen yihr yaa wudh gen tooro. ²⁴ Cub aduuni piny ne lahm kedea udoohngi ne ngad puohny me beer, bang gihn yaa tiihyo yihr Juog ge beehde e ge be weehr. Ge yaaj me beer ke nyoge kedea ge yaa puohny me be dhaahr ke puohny yaa arwaahnyo.

²⁵ Yaa cuung yi yoohni, rubi ke rob me ngey gene ngo ne cohg kejea nea wudh gen beer e Juog ge umeehge ngey gihn maa athiir, noono uyiih gene puohny gihri. ²⁶ Kaano, e wudh gen uyahbo ubodh gene yi boon atiihb ukeehg naa amag gen. Kaano e ge udoohng ne yaa tiihy gihn daahd Juoge.

3

Giuh Uyug Rog Gen Cahng Moogo

¹ Dhiil ngo ke ngahyo yih Timodhy kejea buu unahg tiihy me yoohd ne kwaag yaa ayiiho ke nying giuh utiihy

2:20 2:20 Rom 9:21 2:21 2:21 3:17 2:22 2:22 1Tim 6:11 2:23 2:23
 2:16 2:24 2:24 1Tim 3:3; Tii 2:7-8 2:25 2:25-26 1Tim 2:4 3:1 3:1
 1Tim 4:1; 2Pii 3:3; 1Jon 2:18; Juud 18

yaa reje nea beehn Jeacuu acahngo. ² Nyoge ge unahg yaa wahro me nhyaar ngiihny. Ge unahg yaa nhyaam me koag ke giih amaahg. Ge unahg nyoge me dhahl Juog. Nyoge me dhahl weehg gen. Ge unahg nyoge me leej kwihy gene kedea ge be tud rih Juog. ³ Ge unahg nyoge me luube be wii gene piny, nyoge me nhyaahro tooro yi cwihny gen. Nyoge maa yaa waaj giih toohd me kwihj koar rog gen yihdh giih bal. Nyoge me koag ke giih bad, me maan gihn me beer. ⁴ Ge unahg nyoge maa yaa luom, me wudh gen be cub gene yi gihn tiij. Nyoge maa yaa amaahg me nhyaar giih wuohbo. Ge unahg nyoge me nhyaar rog gen abea Juog be nhyaar gene. ⁵ Rog gen ayug gene wa nyoge me puoj Juog abea giih yug gene nyoadh ngo kejea tee Juog tooro rog gen. Timodhy, yih keá piij ka maa acielo ke kwaad yaa nu. ⁶ Yaa nu ge naa yaa leel rog gen yihdh wuud nyoge ne ci ne mag gom ke maahn me cwihny gen bahw beere wudh gen log gene loo. Maahn maa atiihy thoohn awuohye me doonge. Thoohn giih atiihy gene ge ne meehg wudh gen loo noono udog gene ne tiijy giih reje ge puohny yaa ni yihr gen. ⁷ Kwaad maahn nu ge daahd puohny me teed giih reje e nhyaar gene. Gihn nu e ne bahnge puohny maa athiir, e nyoadh lum Juog be yoad gene. ⁸ Yaa puohny giih toohd ge uroomo wa Janej maa Jambrej naa acub wudh gen ne dhaahr giih atiihy Moaje, ge nyoge me lum Juog arwaahnyo yihr gen. ⁹ Gihn me dier nyoge ke nyinge tooro bang gihn ge beehda nyoge me wudh gen tooro kedea tooy wihj gihr gen noono, ubeehn nyoge me thoohdhe ne ngeyo ka me cahng, toohd gen ungey wa gihn anaa atiihy ree rih Janej maa Jambrej.

3:2 3:2-4 Gal 5:19-21 3:5 3:5 Mat 7:15, 21; Rom 2:19-20; Tii 1:16 3:6
3:6 Tii 1:11 3:8 3:8 1Tim 6:4-5

10-11 *† Abea Timodhy, yih be room ke yaa nu. Kaa apuohnya kii ngo, ngo ngahyi kede a akaahna riha kii ngo, ngo ngahyi thiow. A abeehdo e a ngaa maa amag gihn ayiiha ke cwihnya acielo. A abeehdo e a ngaa maa anhyaar nyoge ke cwihnya me tar. Kaa aguuma giijh reje naa atiihy nyoge riha ge ngahyi. Giijh ajohr naa ayug nyoge riha ke bang wudh geedh Antiog maa Lijtera kede a Yikoohnya, ge ngahyi. Giijh nu ge ayug riha, abea Juog e naa alwahg an oogo yihdh giijh nu cang. ¹² Adiehr, kwaad ngaan daahd ubeehde ke beehd ngaa maa ayiih lum Juog naa anweehd ngo ke Jeacuu Ngad Boadh nyoge, e ngaa nu giijh ajohr ge dhiile kaa yoado. ¹³ Abea mar yaa reje, kede a yaa ucahb ge ubar maalo ke raahyo me duohng udwaahng gene nyoge cang kede a udwaahng gene rog gen ke ngud gen. ¹⁴ Abea mari yih Timodhy, mag cwihnyi teeg mee ungeehri yi lum Jeacuu ge alihngi yi dhog wan. Lum Jeacuu ayiihi ne cohg naa athiir bang gihn wan ke ngud wan ngo apuohny wane yihri. ¹⁵ Yih ke ngudi, giijh agweed yi kitaab Juog ge angahyi ke coon e yih puud thiin. Luub agweed yi kitaab Juog ge naa ayab wongi kede a uyoadi boadh wahy naa ayiihi Jeacuu Kriihjto. ¹⁶ Kwaad luub agweed yi kitaab Juog ge beeye bang gihn Juog ke ngude e naa meehg gen gweedo. Kitaab Juog beer bang puohny gihn maa athiir yihro kede a nyoadh gihn me raaj yi tiihyo, kitaab Juog e ne yug won teeg beere giijh beeye tiihyo tiihyo. ¹⁷ Noono e ngaa tiihy tiihy Juog gihn me riehy yihre ke tiihyo tooro bang gihn ree agwiire beer mee kede a gihn me daag yihr tooro.

* 3:10-11 3:10 Rom 16:24; 1Tim 1:5 † 3:10-11 3:11 Tiihy 13:50; 14:5, 19Guum giijh reje: 2Kor 11:23-29 3:12 3:12 Mat 16:24; Jon 15:20; Tiihy 14:22; 1Th 3:3 3:14 3:14 2:2; 1Tim 1:10 3:15 3:15-16 Jon 5:39; Rom 15:4; 1Tim 4:13; 2Pii 1:21 3:17 3:17 2:21

4

Lum Arab Yihr Timodhy

¹ Gihn me tiihyi e man cuba yihri. Juog kedea Jeacuu Kriihjto Ruohdh, ge naa cuude giuh cuba gihn tiihyi nyum gen. Jeacuu beehda cuud yi tiihy cuba yihri bang gihn unahg en e nuu ukihm nyoge cang cahng ubeehne ne beehd yi Dhaahre ke yaae. ² Beehdi e rihi agwiiri ne puohny lum Juog maa adiehr yihr nyoge. Dhiil ngo ke puohnyo yihr gen keehd me toor cwihny gene lihng giuh puohnyi ni. Cohg wudh yaai kedea cuow gen nea ge awaahj. Gihn beer e dhiil gene ke tiihyo rob ngo yihr gen. Yih keá dhaahr ne puohny lum Juog yihr gen. ³ Tiihy giuh nu bang gihn cahng ukweer nyoge mooge ke lihng puohny gihn rob athiir yihdh luub Juog ngo ubeehn. Noono udooing gene e ge cej yaa puohny me puohny kwaad giuh daahd gene ke lihngo, giuh me be nhyaar Juoge. ⁴ Ge ukweer ke lihng puohny maa adiehr kedea ucub gene wudh gen ne lihng giuh maa puoge. ⁵ Teeda teedo yihri thioiw kejea mag cwihnyi ubahng giuh me reje be yugi. Nahgi ngad guum, puohny Ciig Beer ge rubo ke nying Jeacuu yihr nyoge. Yi tiihyi noono tiihyi yihr Juog, tiihyi kwaad gihn romi ke tiihyo utoor gihn me wii piny.

Poal Kea E Cahng Ke thoo

⁶ Giuh ni ge aroba yihri bang gihn wahya ge awiia yihr Juog maa nihna ge athum wiuh piny. ⁷ Abea keehd me thowa, e cwihnya med bang gihn giuh me teeg yihdh gen acaara kedea lum Juog amaga teeg mee. A rom yuohmo arumo bang gihn tiihya ngo awahdh guge. ⁸ Koog gihra ngo akan. Koog gihn cub Jeacuue ngaa ngahy lug yihra

4:1 4:1 Tiihy 10:42; 2Kor 5:10; 1Pii 4:5 4:2 4:2 Tiihy 20:20, 31; Tii 1:13
 4:3 4:3 1Tim 1:10; 4:1 4:4 4:4 1Tim 1:4 4:6 4:6 Pihp 2:17; 2Pii 1:14
 4:7 4:7-8 1Kor 9:24-25; Pihp 3:12-14; 1Tim 1:18

Cahng Lug. Ngo ucub yihra kedea yihr yaa abuhj ke koar cahng duu Jeacuue.

⁹ Cej dhe yooh me laari beehn banga piow piow.
¹⁰ * Demaj ngaa acub wiihe rog giih upiny kan akweer ke beehdo banga. Ngo a'aay ucea geen Thecaaloanika. Kreajen thiow a'aay. Ngo ne Galaadya, kedea Tiihtuj aci Dalmaacya. ¹¹ † Luka e ne ne banga kan cog. Kuung Maarko, keá wii piny. Beehni keehde tiehd beere a konye konyo ke tiihj. ¹² ‡ Tiicijuj ngo tooro thiow bang ngo aohra Epicoj. ¹³ Nea yih ubeehno, kea kuung waaro gihr koohyo gihn anaa awiia Troaj bang Kaarpuj. Kuung kitaabe giiha keehd yihn tiehd, kitaab gihn ngahye abahj ke deehl keá wii piny.

¹⁴ § Alekjander ngad thaahdho gihn me raaj atiihye riha. Gihn ngo unahg Juog e nuu ucoal ngo wa kaano atiihye ngo riha. ¹⁵ Yih ke ngudi, koar rihi beer mee utoor gihn me raaj me tiihye rihi. Koar rihi bang gihn ngo ngaa me raany puohny gihro.

¹⁶ Bekihd ngaa maa anaa acuung ke an cahng athuba ke goony nguda nyum lug. Nyoge cang ge agoohd oogo riha. Beehn Juoge wiie gihn nu piny yihr gen. ¹⁷ Abea Juog acuungo ke an ucube tee yihra beere Ciig Beer roma kaa puohnyo kedea ubeehn yaa padh Judea urom gene ngo ke lihngo. Juog a alwahge oogo yi dhe nguu. ¹⁸ Noono e ngo gaahna gaahno kejea Juog a ukonye thiow yihdh giih me reje ge poohd ne wong maalo uwahdhe ka ukedhe an Maalo yi Dhaahre. Puojo Juog ke nihn ke nihn. E noono.

* 4:10 4:10 Pihp 2:21Demaj: Klo 4:14; Pihl 24; 1Jon 2:15Tiihtuj: 2Kor 2:13
 † 4:11 4:11 Luka: Klo 4:14Maarko: Klo 4:10 ‡ 4:12 4:12 Tiicijuj: Klo 4:7-8 4:13 4:13 Tiihy 20:6 § 4:14 4:14 Mat 16:27Alekjander: 1Tim 1:20 4:16 4:16 1:15 4:17 4:17 Tiihy 1:8; 23:11 4:18 4:18 2Kor 1:10; Pihp 1:19-20

¹⁹ * Maahdh Prijkiila kedea Akwiila, maa yaa beed paar Onecipoaruj. ²⁰ † Erajtuj adoohng Korindh, kedea Troapihmuj awiia Mileatuj bang gihn ngo anaa atwaany. ²¹ Deed cwihnyi udhiili beehno e ruudo poohd kuu athubo. Yih amaahdh ge Yubuluj, kedea Puuden, maa Linuj kedea Klaawdyae. Yaa ayiiho cang yih amaahdh gene. ²² Yih ukaahn Juoge ke yoohm rihi kedea beehn Juoge ucube muunye yihri.

* 4:19 4:19 Akwiila kedea Prijkiila: Tiihy 18:2Onecipoaruj: 2Tim 1:16-17

† 4:20 4:20 Erajtuj: Tiihy 19:22; Rom 16:23Troapihmuj: Tiihy 21:29

Anwehd Me Nyaahn

Luwo: Anwehd Me Nyaahn New Testament

copyright © 2003 Wycliffe Bible Translators, Inc.

Language: (Luwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 13 Jun 2022

ba8353b1-57d5-55f2-870a-7ae8e7acbe62